


DVIJE NAGRADE ZA NACIONALNU I UNIVERZITETSKU BIBLIOTEKU BOSNE I HERCEGOVINE U 2006. GODINI



TWO AWARDS FOR NATIONAL AND UNIVERSITY LIBRARY OF BOSNIA AND HERZEGOVINA IN 2006

Dženana Tuzlak

NUBBiH/NULBH, Sarajevo
Bibliography Department
dzenana@nub.ba

In 2006, National and University Library of Bosnia and Herzegovina was awarded with two acknowledgements for its work. These are the Sixth of April Award given by the City of Sarajevo and "Sloboda" by the International Peace Center.

Nacionalna i univerzitetska biblioteka Bosne i Hercegovine dobitnik je dva velika društvena priznanja za svoj rad - Šestoaprilske nagrade Grada Sarajeva i nagrade „Sloboda“

Šestoaprilska nagrada Grada Sarajeva je najveće priznanje Grada Sarajeva, koje se svake godine dodjeljuje u povodu Dana Grada zaslužnim pojedincima i

kolektivima. Odluku o dodjeli nagrade donosi Odbor za Šestoaprilsku nagradu, sastavljen od 13 članova koje bira Gradsko vijeće. Svaki od članova Odbora samostalno razmatra doprinos svakog od predloženih kandidata za nagradu.

Kolektivna Šestoaprilska nagrada Grada Sarajeva u 2006. godini dodijeljena je i Nacionalnoj i univerzitetskoj biblioteci Bosne i Hercegovine. Na svečanosti koja je održana u Narodnom pozorištu, gradonačelnica Semiha Borovac uručila je ovu nagradu dr. Ismetu Ovčini, direktoru Nacionalne i univerzitetske biblioteke BiH. Zahvaljujući se u ime kolektiva na čijem se čelu nalazi, i u svoje lično ime, dr. Ovčina je istakao: „Ovo će priznanje dodatno afirmirati Nacionalnu i univerzitetsku biblioteku Bosne i Hercegovine, potvrditi potrebu njena postojanja, te rješavanje njenog pravnog i finansijskog statusa. Nama je ovo podstrek za još plodotvorniji rad.“

Nacionalna i univerzitetska biblioteka BiH osnovana je



*Direktor NUBBiH dr. Ismet Ovčina sa gradonačelnicom grada Sarajeva Semihom Borovac
i ostalim dobitnicima Šestoaprilske nagrade Grada Sarajeva*



1945. godine i već šest decenija uspješno obavlja svoju kulturnu, obrazovnu i naučnu misiju. Kao centralna biblioteka Bosne i Hercegovine ona prikuplja, čuva i daje na korištenje različite vrste građe, bogato dokumentarno nasljeđe svih naroda Bosne i Hercegovine. Granatiranje zgrade Vijećnice 1992. godine, u kojoj se nalazila Biblioteka, i uništenje bibliotečkih fondova, nisu mogli pokolebati njene djelatnike da iznova započnu svoj rad, u iznimnim uslovima. I uspjeli su u tome. Uz nova odjeljenja, formirani su i centri za ISBN, ISSN, ISMN, Centar za permanentno obrazovanje bibliotekara. Od 1998. godine reaktiviran je i COBISS (Cooperativni online bibliografski sistem i servisi), a 2005. formirana je Virtualna biblioteka Bosne i Hercegovine, sa sjedištem u Nacionalnoj i univerzitetskoj biblioteci BiH. Biblioteka je članica međunarodnih bibliotečkih asocijacija - IFLA, CDNL i CENL. Njena univerzitetska funkcija poboljšana je pristupom svjetskim relevantnim bazama podataka. Obavlja se i edukacija bibliotečkih radnika za više zahtjevnih obaveza koje im se nameću u informacijskom okruženju, primjeni digitalne tehnologije i očuvanju i prezentovanju kulturnog nasljeđa.

Nacionalna i univerzitetska biblioteka BiH bila je i ostala

multietnička institucija koja čuva ogromno duhovno i kulturno stvaralaštvo cjelovite Bosne i Hercegovine, uspjevši da preživi, baš kao i grad u kojem se nalazi. Zato je s punim pravom i zaslužila Šestoaprilsku nagradu Grada Sarajeva.

Nagrada „**Sloboda**“ je tradicionalna nagrada Međunarodnog centra za mir u Sarajevu, koja se takođe svake godine dodjeljuje pojedincima i ustanovama za njihov izuzetan doprinos razvoju humanizma, ljudskih prava i sloboda u Bosni i Hercegovini, Evropi i svijetu. Tako je povodom 10. decembra, Međunarodnog dana ljudskih prava (kada je proglašena „Opća deklaracija o pravima čovjeka“), Ibro Spahić, direktor Međunarodnog centra za mir u Sarajevu, dodijelio ovo priznanje za 2006. godinu i Nacionalnoj i univerzitetskoj biblioteci Bosne i Hercegovine. Time je biblioteka, uz istaknute osobe i institucije iz Bosne i Hercegovine i svijeta (Jasmila Žbanić, Tilman Zülch, Umjetnička galerija BiH, Aleksandrijska biblioteka i dr.), postala dio tima koji, radeći svoj posao, istrajava na ljudskim pravima i slobodama. To je plemenita misija koja budi nadu u svijetu, u kojem smo i sami svjedoci različitih kršenja zagarantovanih prava i sloboda čovjeka.